

一百首歌 一百種感覺

作者: 我勁過朗尼

Powered by [紙言](#)

愛你 許志安

愛你 我管不了是禍
未想過是為何 能愛著你苦也未去躲

每個人對愛情，都會抱有一種轟轟烈烈嘅感覺，亦都唔會介意任何嘅辛酸，去對你嘅對象無條件地付出同支持。但係，呢個態度，從來都係唔會有原因。

身邊有啲人，成日都會有一個疑問，你中意一個人，人地都唔係中意你，點解你唔試下去搵另一個呀？可能另一個人，係可以同你有發展嘅空間，但係佢真係你想搵嘅幸福？呢一點，可能每位讀者都有唔同嘅睇法，但對我黎講，另一個人絕對唔會帶到你心儀對象所比到你嘅快樂。即使你心儀對象，可能對你從來都冇一點嘅心動，但只要你喺身邊默默去為佢付出，幾辛苦都唔好抱怨唔好介意，有一日，可能有意想唔到嘅回報。

愛你 最想得你附和
像這宇宙諧和 求你像我不要亂去想 為甚麼

愛一個人，從來都係雙向嘅。每個人都只係想得到對方嘅附和，永遠都唔想對方對自己冷淡。可能每一段愛情，經歷過時間嘅洗禮，去到唔同嘅階段會出現好多嘅不確定性。但係，千祈唔好去諗點解會有呢啲問題，既然問題都出現左嘅時候，咪一齊同另一半去面對囉。每一對愛侶都只係想得到自己另一半無條件嘅支持，你肯去支持對方，就算佢有幾大嘅難題，只要有你嘅附和，一定可以關關難過關關過。

天下無雙 陳奕迅

給我信心 當我未如願
披雨戴風問寒送我暖
親切眼光 舒我亂和倦
從無更改心照總不宣

每對愛人又好，就算係一啲比較親密嘅朋友都好，喺啲無盡如意嘅時候，只要得到身邊人嘅支持，好似可以幫自己叉足電咁，令自己得到力量去將身邊唔如意嘅事迎刃而解。香港嘅流行曲歌詞，大多都以押韻同對偶為主，林振強先生喺呢幾句歌詞裏面就充分體現到呢一點。喺唔如願嘅時候得到身邊人去送暖，用一個親切嘅眼神已經係一種表達方式，我相信當你唔如意嘅時候得到呢啲嘢，就算幫唔到你去解決問題，起碼你已經贏左對方對你嘅重視。不論係愛情或者係友情，只要你得到呢啲嘢，就算個難題最尾係解決唔到，你都已經係一個贏家。

一切也不 推說亂和倦
一次你都未曾去計算
給了再給 始了便無斷
無條件分擔各種辛酸

當一個人好想有另一半去陪你分擔自己嘅辛酸，只要佢無條件咁支持你，唔去斤斤計較，你已經可以話係贏左。但係現實中，每對愛人之間總會出現好多斤斤計較嘅情節，生活上嘅大小事，雙方都會向對方諸多挑剔。當出現呢種情況嘅時候，仲可以點樣同對方分擔大家嘅辛酸呢？現實之中，每對情侶分開嘅原因，出軌永遠都唔係其中一個最嚴重嘅原因。反而大多數分手嘅原因好多時都係大家互相計較生活上所出現嘅小問題。一段愛情最理想嘅結局係走到最後，唔係結左婚就等於係最後，而直到另一半百年歸老先係真正嘅最後。當大家都對自己另一半係咁抱怨，仲點可以一齊行到尾，點可以做到真正嘅天下無雙呢？所以，都係好好咁幫你另一半分擔大家嘅辛酸同唔如意嘅事，咁樣先係真正嘅愛。

。

今生不再 黎明

同渡過這盛世 隨手都採到星火的美麗
但我怎知道這份執迷 抱入來世 仍在你軀體

每個人對一段得唔到嘅愛情，總會有一份執迷。呢一份執迷，未必一定係執迷不悟。得不到嘅愛情，從來都係最美好同最刻骨銘心，甚至乎可以帶來好多種唔同嘅幻想，可能呢一世，大家都心知肚明，呢段關係最終唔能夠開花結果，但可能到最後一刻都會幻想緊，下一世可能有機會同你自己心儀對象再續前緣，只要唔忘記對方，就算輪迴轉世之後都可以有機會再走翻埋一齊。世事嘅嘢，邊個會估到曬所有結果，邊會有咁多個世界冠軍呀！

就趁那歌聲悠揚
玻璃倒映了今生不再的幻象
天空正掛著今世最亮的月亮
蜚短流長未來將怎麼設想

正如上面講到，未來嘅嘢冇人知，就算係你下一刻所發生嘅嘢都唔會有人估到曬所有結果。可能呢一刻你係平平安安，但係下一刻你條命隨時就可以冇左。每個人對於愛情，對於生活，好多時都唔識去把握最好嘅時機，往往去到失去左之後先識後悔，既然個機會喺你面前嘅時候，不管係友情、愛情甚至係親情，最好趁眼前嘅機會去好好維繫。有啲嘢，下一世未必可以再做得翻，點解唔趁今世去好好完成呢？最起碼唔會到死果刻都仲有帶唔走嘅遺憾嘛。